

williglichen uffgelassin allis unnd iczlich seyn erbe unnd gut unnd nemlich seynen teyl, den er gehabt hat in unnd an dem dorffe und gutte Gelnaw in dem Camenczisschen gebiete gelegen, mitt dem vorwerke, mit czinsen, czinshaftigen guetern, mit den erben unnd erbbesitzern, mit wesen, weyden, freyhen triften, mit wassern, — obersten unnd nedersten
 5 gerichtten —, als dasselbe guet der gnante Baltasar Cunad selbis gehabt hat und von seynem vater an en beerbit ist, umb eyne benante summa geldes, der er wol czu dancke bezcalit ist, vorgnuget unnd vorgulden, den erbern wolweisen, burgermeister unnd rathmannen der stat Camencz, — zu handen der gnanten statth Camencz. Hiruff habin unns beide teile demutiglichen ersucht unnd gebatin, das wir sulch obingemelt guet unnd
 10 teyl — der gnanten stat Camencz — geruchten zu vorleyen. Habin wir betrachtet unnd angesahen —, unnd haben von zunderlicher unns vorlegener koniglichen macht dos obingemelte guet unnd teyl — den vorgnanten burgermeister unnd rathmannen der stat Camencz — zu handen der gnanten stat Camencz genediglichen — gereicht —. Mit orkunde vorsigilt mit unserem anhangenden ingesigil. Geben zcu Budissen am dinstage
 15 vor unnsers hern hymmelfart tage noch Cristi geburt fierczenhundert dornoch in dem drey und sebenzigisten jaren. Dorbey seyn gewest die gestrenge und veste, Baltazar vonn Schreybersdorff zu der czeyt hewptman zu Budissen, Caspar von Nostitz hewptman zu Gorlicz, Cuncze Wese unnsere marschalk, Hanns Rotkirche Sprothanns gnant unser hofegesinde unnd Georg von Nehmen unser oberster schreyber, dem deser brieff
 20 wart befohlen.

136.

Der Landvogt Herzog Friedrich von Liegnitz verkauft die ihm von König Mathias verschriebenen 26 Schock königlicher Rente auf der Stadt Kamenz an den Görlitzer Stadtschreiber Magister Johannes Frauenburg und reicht sie ihm zu Lehn. **Bautzen, 1473 Aug. 2.**

25 *Hdschr.: Vidimus des Raths zu Bautzen auf Perg. von 1473 am montage des tags send Lucas, Rathsarchiv zu Görlitz.*

Wir Friderich von gotis gnaden in Slezienn herzog und herre zcu Legnitez und zum Goltberge ꝛc., von Behmischer kuniglicher macht der land und sechs stete Budissin, Gorlicz, Zittaw, Luban, Lobaw und Camencz voit und amptman, bekennen offintlich mit disem brive vor allirmenniglich, das wir recht und redlich verkawfft habin dy sechs und
 30 zewenzeig schog geldis jerlichs zcinszs, die der irlauchtigste furste und herre, herre Mathias zcu Hungern, zu Beheim ꝛc. kunig, unnsere gnedigster herre, in und wff seiner kuniglichen gnaden stat Camencz uns damite begnadet und gnediglichen verschriben hat, deme achtparn magistro Johanni Frauenburg, statschreiber zu Gorlicz, der^{a)} solliche obingemelte zcinse vor sich, seine erben und erbnemen von uns wffrichtiglichen gekowfft
 35 hat umb eine benant suma geldis, der wir von im ganz und gar wol zu danke bezcalit sein und kuniglichen vergulden (*sic*), die jerlich von der obgnanten stat Camencz inzcunemen, zu furdern, zu haben und zu benuczenn in allir masze, als wir die selbis gehabt